

## II võrokeelitside koorilaulõ ja -säädide konkurss

### Alostusõs

29. mail 2010 oll' Põlvan Indsikurmu lauluväljaku pääl tönõ võrokeeline laulupido Uma Pido. Päält suurõ hulga publiku oll' pidol 3400 lauljat. Naid tull' pidolõ innekõkkõ Lõuna-Eesti maakundõst (Võro, Põlva, Tartu ja Valga), a kuurõ, kiä tahtsõ' pido laulu' är oppi, oll' viil 5 maakunnan ja ka vällämaal (Läti, Suumõ, Euroupa Eestläisi kuur). Pidol läts' kõrda tuvva' vällä vana Võromaa kihkundlik vaim, pitä' ummi juuri tähtsäs ja näüdädä' lõunaestilist nalalist ilmakaemist. "Rajoonipiiri" taal pidol kinkalõgi kõrda es lää' - kõik aig oll' tunda' maakunnapiirest üle olõvat, kultuuriruumi-põh'alist ütist hengämist.

Pido mõtõ sai alostusõ võrokõisi egä-aastadsõl suvitsõl tegemisel Kaika suvõulikoolin Valgjärvel 2006. aastagal, kon tuukõrdsõ' Põlva ja Võro maavanõmba' Urmas Klaas ja Ülo Tulik kõnõli' kultuurilidsest kuntüüst võro kultuuriruumin. Edimäne pido oll' 30. mail 2008 Võrol Kubija lauluväljaku pääl, tönõ 2010. aastagal Põlvan ja vahtsõt pito om uuta 1. juunil 2013. jäl' Võrol Kubijal.

Nii edimädse ku tõsõ umakeelitse pido kõrraldus ja repertuaarivalik lätsi' kõrda. Laulõ valimise man peeti tähtsäs, et teksti' vai naidõ autori' olõsi' peri vanalt Võromaalt niimuudu, et tekste vai viise olõs võimaligult kõigist vana Võromaa kihlkundõst ja et esi kantõ keele-erinevuse' olõssi tunda'. Tõlkõtekste es pruugita. Mõlõmba pido kavan oll' regilaulõ, rahvalikkõ laulõ, klassikaliidsi koorilaulõ ja kuurõlõ säetüid poplaulõ.

Pitõ kõrraldus näüdäs', et umakeelist repertuaari, niisamatõ tekste, minkalõ laulõ tetä', jakkus, a veitüs jääs koorisäädit ja laulõ, miä kuurõlõ passisõ'. Edimädse pido jaos koorisääde' telliti, a edespite loodõtas Uma Pido repertuaari tävvendä' ka avalige konkurssõga. Edimäne sääne konkurss oll' 2009. aastagal. 2010. aastaga pidolõ tull' säält 6 laulu (konkursilõ esitedi 17 laulu).

### Konkursi kõrraldus

Konkursi eesmärk on võrokeelitse koorilauluvara rikkus. Oodõtas nii naid laulõ, miä passisõ' häste laulupidolõ, ku ka naid, miä kõlasõ' parõmbahe kontserdisaalin vai muial. Konkursilõ või saata nii koorisäädit joba olõman laulõlõ ku ka peris vahtsit koorilaulõ. Mõlõmbit nimetedäs edespite sõnaga "teose". Oodõdu' omma' teose' kõigilõ kooriliikele *a capella* vai saatõga: ühendkuur, segäkuur, naiskuur, miihikuur (helle arv kõigil 3-4), latsikuur (helle arv 2-3), poiskõisikuur, mudilaisikuur (helle arv mõlõmbal 1-2).

Oodõtas võrokeelitsit võistlustõid. Ku teose luumise man võetas alussõs rahvalaulutekste ja -viise, sõs om tähtsä, et nuu' olõssi peri ütist vana Võromaa katsast kihlkunnast (Karula, Harglõ, Kanepi, Urvastõ, Vahtsõliina, Rõugõ, Põlva ja Rāpinä). Muiõst kiilist tett tõlkidõ pääle luudu teose' olõ-i konkursilõ oodõdu'. Konsultatsiooni ja soovituusi tekstele saa konkursiperioodi ao seen Võro Instituudist (triinu.ojar@wi.werro.ee, tel 78 28 750).

Võistlusõlõ tulnu teose' või-i olla' varramba trükin ilmunu vai avalikkusele esitedü. Ärtrükit või olla' ja ka avalikkusele esitedü külh tekst, minkalõ muusika luudi vai ka laul, minkalõ tetti vahtsõnõ sääde. Varramba avaldõdu lauluteksti vai muusiga autori nimi pallõldas panda' võistlustüü pääle.

Võistlustüü pääle tulõ panda' märgusõna. Sama märgusõna all või võistlustüü mano panda' eräle lehel teedüse ja seletüse' teose kottalõ, näütüses teose saamislugu, autori soovi' esitüsele ja saatõlõ vai muud säänest. Andmõ' heliluuja ja teksti autori kottalõ (nimi, isikukuut, postiaadrõs, telefon) tulõ tüüle sama märgusõna all kinnilidsen kuväärin mano panda'.  
**Võistlustüü' tulõ saata Võro Seldsi VKKF aadrõsi pääle (Tartu 48, 65609 Võro) ildampa 15. septembris 2011.**

Teosit hindas kooni 5 liikmega žürii. Parõmbidõ tõie autori' saava' stipendiumi', miä antas vällä konkursi lõpukontsõrdil 2012. aastaga imäkeelepääväl. Avvuhinna saava' egä kooriliigi parõmba' tüü' ja ku vaia lätt, antas vällä eripreemijit. Ku avvuhind antas teosele, mink tekst om trükin avaldamada ja/vai spetsiaalsõlt konkursi jaos tett, sõs saava' stipendiumi ka teksti autori'. Ku konkursilõ tulnu tõie tase om kehvä vai passi-i tüü' muiõl põhjussil võrokeelitse lauluvara hulka, om žüriil õigus jättä preemiä' vällä andmada.

Kõigi stipendiumide suurusõ otsustas žürii. Konkursi avvuhinnafond om 2000 eurot ja sinnä omma' andnu uma osa Eesti Kultuurkapitali rahvakultuuri sihtkapital, Võro ja Põlva ekspertgrupi' ja Võro Selt VKKF.

### Lähemb teedüs:

Võro Selt VKKF, Tartu tn 48, 65609 Võro  
tel 78 28750, 78 28752  
projektjuht Triinu Ojar  
tel 533 22 153, e-post triinu.ojar@wi.werro.ee